

24. oktober 2018

UKA2018/153

**Apeqqueteqaat aallaavigalugu Inatsisartuni oqallisissatut siunnersuut, nunatsinni sulisussaaleqi-salernerup anigorniarnissaa qanoq iliorluta aqqissavarput ?**

Inatsisartuni ilaasortaq Mute Bourup Egede , Inuit ataqtigiit.

Inatsisartunut ilaasortap Mute B. Egede-p oqallisissiaa pillugu Siumumit imaattumik oqaaseqarusuppugut.

Ukiuni arlaqalersuni sulisussanik amigaateqartarneq piffissap ilaani saqqummertarpoq. Naak suliffissaaleqisut september 2018 nalunaarsorneqarsimasut 1.561 -inik amerlassuseqaraluartut.

Aasaanerani aalisartortatsinnut qujanaqisumik aalisagarpasuit takkusimaartarput. Ajuusaar-naraluartumilli aalisakkerivinni sulisussaaleqinerit takornartaanat. Suliffissuillu ilaasa allatut ajornartumik sulisartut nunanit allaneersut ikiortissatut tikisittariaqartarlugit.

Taamaaliortoqanngippammi annilaangatigineqarpoq nunatta avammut niuerutaa annerpaaq aalisarneq ajornartorsiortitaasinnaammat. Minnerunngitsumillu aalisartut aasaanerani aningaasarsiorluarfissaat aamma aalisartunut pitsaanngit.sumik kinguneqarsinnaalluni.

Qangaanerusoq atuartut annerit aasaanerani atuarunnaajaartinneqartarput inuiaqtigiit aningaasarsiornissaannut peqataatinniarlugut. Maani inimi isersimasut sinerissamilu tusarnaartut amerlasuut taamatut inuiaqtigiit ikiorlugit sulisarsarsimanerminnik eqqaamasaqassapput. Aammalu ilaqtariinnut isertitatik annertuumik aningaasatigut tapertaasarsimallutik.

Ukiunili nutaaliaasuni nunarsuarmiooqataalernitsinni malitassat assigiinngitsut patsisigalugit taamaaliornissaq ajornarnerulersimavoq.

Nunat sanilerisatta ilaanni inersimasut amerlasuut arlalinnik suliffeqartarput takussutissaqarporlu soorlu Islandimi nunarsuatsinni aningaasatigut ajutoorneq piffissaq sivikitsoq atorlugu qaangerneqartoq.

Nuna namminiilivinnissatsinnut nuannaarsorinarpoq.

Aamma Siumumiit isumaqarpugut utoqqalinersiutilinnut suliffeqarnissaq kajumernartunngor-tinneqaratigut. Massakkummi soorlu utoqqalinersiallit arlaqartut kilisaatini usingiaasutut sulisarput. Isertitatigulli killissarititaq anguneqaraanngat uggornaqisumik suliunnaarallartarlutik.

Kikkulluunniit sulerusuttut killilersornagit sulinissaannik periarfissaqartittariaqarpagut.

Innuttaasunut periarfissalinnut ukiumut ataasiinnaanngitsumik suliffeqarsinnaanerup pitsaasumik periarfissinneqarneratigut aningaasat inuiaqtigiinni kaavilertinneqartussat amerlanerulernissaat qularinngilarput aammattaaq ilaqtariit aningaasaqarnikkut inissisimanerat pitsaanerulersissa-varput.

Inatsisiliornikkut sulinerup akilersinnaajuaannarnera ujartortariaqarparput, pisinnaasortagullu ataasiinnaanngitsumik akilerneqarluartumillu sulinissaat periarfissarsiuullugu.

Taamatut oqaaseqarluta oqallinnissamut peqataanissatsinnut qilanaarpugut.

Henrik Fleischer, Siumut